

Ang Komunikasyon ng Pananaliksik at Kahalagahan Nito

Dr. Lakangiting C. Garcia

Kahulugan at Ikinaiba

May mga kalituhang hatid ang magkakatulad na salita na minsan ay nagpapalit lamang ng puwesto o nag-iiba lamang ng inklitik sa kanilang pagitan ngunit nagdudulot ng pagbabago sa kahulugan tulad ng mabait na bata (higit na pinahahalagahan dito ang katangiang mabait kaysa sa kalagayan ng edad) kumpara sa batang mabait (higit na pokus sa murang edad kaysa sa katangian ng ugali). Maraming mga tao ang hindi na ito pinapansin dahil wala namang naidudulot na sama. Kung sa kultura nga nating mga Pilipino ay pinalalampas na ang mga tulad nito dahil :yun nay un” o “understood” na kasi. Ngunit paano sa sitwasyong mahalagang matiyak ang pagkakaiba ng ibig sabihin? Hindi ba dapat na isaalang-alang na ang katiyakan ng kahulugan?

Gumawa tayo ng simpleng sitwasyon.

May manliligaw ang isang babae na sadya namang maraming batid at mataas ang pinag-aralan ngunit lagi na lamang ipinagyayabang ang kanyang mga nalalaman.. Dahil boto ang ina ng babae sa manliligaw ay inilarawan niya ito bilang **mayabang ngunit matalino**. Samantala, tutol naman ang ama ng babae sa manliligaw kaya inilarawan naman niya ito bilang **matalino ngunit mayabang**. Samantala, ang nakababatang kapatid ng babae na ayaw pumanig sa sinuman sa kanyang mga magulang ang nagsabi naman na **matalino at mayabang** ang manliligaw.

Masdan kung paano nabago ng paglilipat ng mga salita at pagpapalit ng inklitik (ngunit, at) ang kahulugan ng mga pahayag ng pamilya sa halimbawa. Ganito rin halos ang dahilan ng pagkalito ng marami sa pagkakaiba ng komunikasyon ng pananaliksik

sa komunikasyon sa pananaliksik sa pananaliksik sa komunikasyon. Ngayon, upang hindi ka na mapabilang pa sa mga nalilito, pag-ibahin na natin ang tatlong nabanggit.

Proseso ng pagbibigay-kahulugan o pagsasalin ng mga kumplikadong natuklasan sa pananaliksik sa isang wika, format o anyo at konteksto na maaaring maunawaan ng mga hindi dalubhasa o hindi tuwirang kabilang sa larangang tinatalakay o pinapaksa ang ***komunikasyon ng pananaliksik*** (research communication). Dapat linawin na iba ang ***komunikasyon sa pananaliksik*** (communication in research) na tumutukoy sa paraan o sistema ng pagpapabatid sa loob ng isang pananaliksi na kasama ang hagod ng pananalita, paggamit ng wika at iba pa. Iba rin ang tinutukoy kapag ***pananaliksik sa komunikasyon*** (communication research) ang pinag-usapan sapagkat tumutukoy naman ito sa isang pananaliksik na komunikasyon ang siyang pinapaksa.

Hindi katulad ng marketing at pagsusulong ng isang produkto o serbisyo ang komunikasyon ng pananaliksik dahil isang proseso ito na pinapayak at pinasimple ang mga output ng orihinal na pananaliksik sa isang anyo na tumutugon sa ipinahayag na mga pangangailangan ng mga benepisyaryo. Mga pinatutungkulan o benepisyaryo ang siyang prayoridad ng komunikasyon ng pananaliksik. Maaari itong magkaroon ng mahalagang papel sa adbokasiya dahil ang naiuugnay at napapanahong impormasyon ay posibleng magresulta sa mga positibong interbensyon ng mga gumagawa ng patakaran at maging ng mga hakbangin ng gobyerno.

Sa pandaigdigang realidad, instrumento ang komunikasyon ng pananaliksik sa pagpapaunlad at pagpapabuti ng kalagayan ng mga indibidwal na naninirahan sa mahihirap at umuunlad na mga bansa. Naipababatid kasi maging sa mga hindi sapat

ang pinag-aralan o kaalaman ang mga bagay na eksklusibo lamang dati sa mga pantas at dalubhasa. Kaalinsabay nito, nabibigyan din ng kapangyarihan ang mga mamamayan na higit na makontrol ang kanilang buhay gamit ang mga karagdagang impormasyong hatid ng mga mapanghahawakang pananaliksik.

Laon ng batid na nakapagbibigay ng mga kinakailangang kaalaman at kakayahan ang mga mahahalagang pananaliksik upang maisakatuparan ang mga pagbabago. Ang Microsoft Research ang isa sa mga aktibong nagsasagawa ng mga komunikasyon ng pananaliksik gamit ang iba't ibang media at matutunghayan ang mga ito nang libre o walang bayad. Nagsasagawa na rin ng mga ganitong pagbabahagi ang DLSU lalo na sa anyo ng mga seminar at workshop.

Gayunman. sa mahabang kasaysayan ng tao, hindi patas ang pagkakataong malaman ang mga nararapat malaman ng bawat indibidwal dahil may mga pagkakahati o dibisyon, pagkakaiba ng lahi, istratipikasyon sa kalagayang pang-ekonomiya, diskriminasyon at marami pang iba. Sa lagay ng ating bansa, maidaragdag pa natin sa mga hadlang na ito ang rehiyonalismo at mga suliraning pangwika, Sa panahong ito ng pandemya, laong nakita ang hindi pagkakapantay-pantay ng oportunidad na kinailangan ng mga mag-aaral ang teknolohiya upang makapag-aral, makapagtrabaho o makipag-ugnayan sa kanyang kapwa sa pangkalahatan. Madali ang pagsasagawa ng mga kababanggit lamang na mga bagay sa mga taong kumpleto sa kagamitang kaugnay ng teknolohiya, hindi kinakapos sa pantustos at walang ibang iniintindi kundi ang gawaing nakalaan lamang sa kanya. Lamang, halimbawa, ang isang mag-aaral na tanging pag-aaral ang obligasyon kumpara sa isang mag-aaral na bukod sa pag-aaral ay kinakailangan ding magtrabaho.

Kahalagahan ng Pagbabahagi ng Pananaliksik

Simpleng katanungan... “Para kanino/saan ang iyong pananaliksik?”

Naitanong mo ba ito sa sarili bago ka nagsimula sa ginawa mong pananaliksik? Hindi ka naman marahil biglang nagising sa isang mahimbing na pagkakatatulo at nang makabangon ay agad na nagdesisyon na magsasaliksik ka sa isang paksa, para bigyang-solusyon ang isang suliranin, na walang magiging silbi o makikinabang na mga tao. Isang katotohanan na napakaraming pananaliksik na ang naisagawa sa anyo ng mga lektura, tesis, disertasyon, artikulo at iba pa na nagtataglay lahat ng kani-kaniyang kahalagahan ng pag-aaral bilang bahagi ng pasulat na anyo ng mga ito na hindi naman talaga naipatatutop!

Magbigay tayo ng patunay.

Nariyan ang mga pananaliksik sa agham na layong matulungan ang mga mangingisda o magsasaka na mapabuti ang kanilang pangangalaga sa mga yamang dagat at bukirin na tadtad ng mga mga terminolohiyang makapagpapasakit ng ulo maging ng mga nagtapos sa unibersidad. Isama pa natin sa mga pampabaliw ang mga formula, tsart, estadistika at iba pa na kinakailangan pang bigyang-interpretasyon ng isang eksperto bago tanggapin balido at maunawaang ganap. Pagkatapos... nasusulat pa ang marami sa mga ito sa wikang Ingles.

Ang mga bagay sa itaas ang dahilan kung bakit napakahalaga ng komunikasyon ng pananaliksik dahil ito ang tulay upang tunay na maipaunawa ang isang komplikado at pangdalubhasang pananaliksik sa mga karaniwang tao na pinaglalaanan ng mga natuklasan.

Ang mga kaalaman at kakayahan, kapag naipalaganap at naipatanggap sa maraming nangangailangan, ang siyang magsisilbing instrumento na makapagpapabisa

sa mga itutugon ng mga tao sa mga hamong dala ng kaniyang panahon. Kaalaman sa mga sakit, pagbabago ng klima, pagtugon sa mga sakuna, pagpapabuti ng edukasyon, pagpapahalaga sa kultura at tradisyon ang ilan lamang sa mga paksain ng pananaliksik na kung maipaabot at maihatid kapwa sa mga nasa itaas na gumagawa ng patakaran at mga nasa ibaba na mga hikahos, gamit ang wika at pamamaraang nasa lebel ng kanilang pang-unawa, maaaring mapabuti ang buhay ng lahat.

Kung gayon, ang mabisa at makabagong komunikasyon sa pananaliksik ay isang mahalagang sangkap sa pagtiyak na magkakaroon ng silbi ang isang napapanahon at makabuluhang pananaliksik. Kung wala ito, maraming pagsisikap sa pagsasaliksik ang masasayang.

Mga Hamon at Limitasyon

Isang bagong larangan ang komunikasyon ng pananaliksik sa Pilipinas, kaya tulad ng mga bagong larangan, marami pang mga bagay na hindi pa batid at natutuklasan o matutuklasan pa lamang. Tulad din sa anumang bagong ekperimentasyon, bahagi nito ang mga pagkakamali at mga kahinaan na dulot ng limitado pang mapagbabatayan. Kung kakalapin ang naihatid ng limitado pang mga karanasan sa larangang ito, makapaghahanay ng mga sumusunod na mga hamon at limitasyon:

1. Ang papel na ginagampanan at gagampanan pa ng media. Sa patuloy na pagbabago ng media (tradisyunal at new media) inaasahan ang maraming mga pagbabago o ebolusyon sa paggamit nito. Dagdag pa sa hamon na ito ang mga samang maaaring maidulot ng pagkahumaling sa media tulad ng mga nabanggit sa dokumentaryong *The Social Dilemma* (2020).

2. Pagiging epektibo ng pakikipagsosyo at mga proseso ng pakikipag-ugnayan. Tumutukoy ito sa mga taong kabilang sa pagpapalaganap ng nilalaman ng isang pananaliksik. Posible kasi na napakaganda at kapakipakinabang ang isang pananaliksik ngunit wala itong saysay kung hindi tatanggapin o papansinin man lamang mga taong pinatutungkulan nito. Tunay na maraming magagandang pananaliksik na natutuklasan na lamang na umiiral kapag nahalungkat o nahalukay ng isa ring mananaliksik mula sa mga inaamag at sinasapot ng imbakan.
3. Ang potensyal ng mga teknolohiya ng impormasyon at komunikasyon. Biktima tayo ng napakabilis na pagbabago ng teknolohiya na hindi natin namamalayang naghahati na pala ng mga henerasyon tulad sa nabanggit sa aklat na *When Generations Collide* nina Lancaster at Stillman (2002). Kaalaman sa teknolohiya ang isa sa mga nag-iba sa mga baby boomers sa generation x na muling nangyari nang dumating ang mga milenyal. Ngayon, inihiwalay na rin ng mga batang milenyal ang kanilang sarili at tinawag ang kanilang henerasyon na gen-Z dahil sila ang henerasyong kinagisnan na at bahagi ng buhay ang teknolohiya..
4. Panlipunang mga hadlang sa mabisang komunikasyon. Ito ang nabanggit na natin sa itaas.
5. Pagsuporta sa mga mananaliksik upang makipag-usap. Ang mga mananaliksik ay pamilyar sa pakikipag-usap at pagpaparating ng kanilang pagsasaliksik sa kanilang mga kalarangan ng trabaho. Agad na nagkakaunawaan ang mga ekspertong magkakatulad ng larangan. Gayunpaman, kailangan ng mga mananaliksik ng mga insentibo upang

makipag-usap nang higit na malawak at kailangan ng suporta sa higit na mapanghamong papel na ito. Ihalimbawa natin ang kasalukuyang ginagawa ng OCTA Research Group na nagbibigay ng mga impormasyon sa kalagayan ng covid 19 sa ating bans ana nauunawaan ng mga karaniwang mamamayan. Kung babasahin ang mga talang nakalagay sa website ng DOH, WHO at iba pang katulad na ahensya, mababaliw ang isang karaniwang tao sa pag-unawa ng mga grap, estadistika at mga pormulang matematikal na siya namang magdudulot ng kaguluhan at kani-kaniyang interpretasyon. Dapat suportahan ang mga tulad ng OCTA Research Group, pagtatanggol, pinansyal o kung anuman, sa halip na batikusin o pagdudahan.

Pagwawakas

May mga bagay pang hindi kabilang sa papel na ito na maaaring naririyan ngunit hindi pa lumilitaw o hindi pa napapansin sa ngayon. Bihira rin ang mga artikulong tumatalakay nang buo sa komunikasyon ng pananaliksik. Maging ang Youtube ay naglalaman ng iilan lamang na panooring matino at tunay na pumapaksa sa research communication.

Ngayong batid na natin kung ano ang komunikasyon ng pananaliskisk at ang mga kahalagahan nito, maging bahagi nawa tayo sa lalo pa nitong pagpapabuti at paglawak sa mga darating na panahon.

